

Datum: 13.7. 2025.

Broj: 02-06-1039

SUKOB INTERESA PRI IZBORU DIREKTORICE SEKRETARIJATA VSTV-A: SEKRETAR MINISTARSTVA PRAVDE OCJENJIVAO ŠEFICU KABINETA MINISTRA

Banja Luka, 13. jul 2025. godine – Visoko sudsko tužilačko vijeće BiH (VSTV) imenovalo je Ivanu Zovko-Planinić za direktoricu Sekretarijata VSTV-a, uprkos upozorenjima Transparency International u BiH (TI BiH) na pristrasnost i potencijalni sukob interesa pri njenom imenovanju.

Naime, Agencija za državnu službu BiH sprovela je konkurs za direktora Sekretarijata VSTV Bosne i Hercegovine, te je kao najbolji kandidat ocijenjena **Ivana Zovko-Planinić**, dosadašnja **šefica kabineta u Ministarstvu pravde BiH** i nekadašnja savjetnica člana Predsjedništva BiH, Dragana Čovića. Član konkursne komisije, koja je vršila ocjenu kandidata, bio je i **Željko Bogut, sekretar u tom istom ministarstvu**. Ovo je potvrđeno na osnovu informacija koje je TI BiH dobio od Agencije za državnu službu, te se teško može smatrati slučajnošću u procesu izbora članova komisije.

Budući da su kandidatkinja i član komisije koja je nadležna za sprovođenje javnog konkursa zaposleni u istom organu, postoje opravdane sumnje da je prilikom selekcije i bodovanje moglo doći do **pristrasnosti**, zbog čega je Bogut, po tumačenju Transparency International u BiH, **morao da odstupi iz komisije**.

Ovo je jasno naznačeno i u Zakonu o državnoj službi u institucijama BiH koji jasno propisuje da, ukoliko postoji sukob interesa u odnosu na člana komisije za izbor, taj član daje ostavku na članstvo u komisiji. Istim zakonom je na više mjesta ponovljena **obaveza nezavisnosti i nepristrasnosti** komisija za sprovođenje javnih konkursa, te se posebna pažnja skreće na obavezu izbjegavanja mogućeg sukoba interesa.

Transparency International u BiH je od Agencije za državnu službu BiH zatražio **kopije zapisnika** konkursne komisije koja je razmatrala prijave, te je rukovodstvu Agencije, VSTV-a i svakom od članova Vijeća ponaosob, uputio informaciju o ovom slučaju, kako bi se izvršila provjera imenovanja direktora Sekretarijata i cije procedure sprovedenog konkursa.

TI BiH je apelovao na članove Vijeća da se ove okolnosti uzmu u obzir prilikom samog imenovanja, međutim Vijeće je bez obzira na sve imenovalo Zovko-Planinić, **ignorišući sva pitanja integriteta** procesa selekcije za ovako važnu poziciju.

Sekretarijat VSTV-a BiH pruža podršku i zadužen je za organizaciju rada Vijeća, provođenje odluka, budžet, te sve poslove ključne za funkcionisanje pravosudnog sistema. Iz tog razloga, bilo koja **naznaka pristrasnosti** ili manjka nezavisnosti u procesu imenovanja rukovodioca ove službe može da ima dalekosežne posljedice po povjerenje javnosti u integritet samog VSTV-a, ali i pravosuđa u BiH, koje je ionako poljuljano brojnim aferama.

Ovaj slučaj samo je jedan od mnogih primjera koji pokazuju da su imenovanja u najvažnijim institucijama pravosuđa BiH i dalje pod **otvorenim političkim uticajem**, koji ima prednost u odnosu na zakonom propisane procedure, na koje faktori poput meritornosti, integriteta ili nezavisnosti nemaju suštinskog uticaja.